



STINAPA TA INFORMA

RINCON; KAPITAL DI KULTURA
I NATURESA DI BONEIRU?

No ta fásil pa entrevisté riba su pòrch; henter ora bai tin hende ta pasa na pia òf ta pasa pita den outo. I tur ta grita su nòmber òf hasi un chansa kuné. Pero ku su smail konosí e *mester* bisa nan algu bèk. I komo entrevistadó e loran ku ta sosegá di solo un ratu den su kurá ta distraé bo ora nan ta bula bai i ta parse ku nan tambe ta kumindá. Si, un entrevista ku Rollie Martines ta algu hopi speshal. Rollie (50 aña) a nase na Rincon, meskos ku su pia di ohochi Roy, i mayoria di su 7 otro rumannan. Rincon, e kapital di kultura i naturalesa, e ta bisa orguyosamente. Den e tempu ei su mama no tabata bai hospital ora ku e tabata serka di duna lus. Nò, e tabata bai na Rollie su wela i esei tabata perkurá ku tur kos tabata bai bon. E tin 26 aña kaba kasá ku Poppy Vis di Mentor i nan tin dos yu hòmer di 11 i 7 aña. Semper el a biba na Boneiru ku eksepshon di 4 aña ku el a studia na Kòrsou. E gusta biaha si, i hopi biaha ela bai Hulanda bai keiru kaba. Voral e "Vierdaagse" di Nijmegen e ta gusta hopi. Esei el a kan'é 3 biaha kaba. Awendia e mester baha man na deporte un tiki despues ku el a sufri un atake di kurason basta pisá aña pasá. Futbòl, e deporte ku e tabata praktiká na nivel di veterano e no ta hungando mas, pero si e ta sigui piska i hunga bilyart. Anto dòkter a mand'é kana i kore baikel pokopoko atrobe. Pero e ta determiná di kana Vierdaagse un biaha mas. 23 di yùni 2008 e tabata tokando San Huan ku un agrupashon musikal ora ku el a kuminsá sinti malu i nan mester a mand'é afó purá. El a bai para te na Bogotá despues di un atake di kurason. Aworakí e ta spièrta tur hende kontra humamentu, e motibu prinsipal di su atake. Ora ta puntr'é tokante naturalesa di Boneiru e ta kontesta ku e ta asosí esei ku e kostanan, paranan i kaminda di turista. Nunka e ta fada di eseinan. I meskos ku hopi hende e ta kombensí ku e pida kaminda ku ta baha bai Gotomeer ta e pida mas bunita di Bonaire. Rollie ta kere tambe ku ta un tremendo iniciativa ku awor ta organisá kaminata den parke, di moda ku mas hende por gosa di naturalesa di Boneiru. Pero tòg e ta preferá di gosa di laman for di kantu despues ku el a hera di hoga dos biaha, e ta hari. Rollie ta keda un tiki strañá tambe dor di notisianan den korant ku Boneiru ta birando mas sushi dia pa dia. E ta di opinion ku Selibon ta hasiendo un bon trabou i mondinan pokopoko ta birando mas limpi. E ta atmití ku e no sa partisipá den kampañanan di limpiesa, pero e mes si no ta tira sushi niun kaminda, i e ta siñando su yunan meskos! Pero tòg Boneiru ta mas limpi ku por ehèmpel Kòrsou. Kuidadosamente e ta agregá ku STINAPA ta hasiendo un bon trabou tambe, pero mester wak ku ta keda espasio pa nos mes hendenan hasi uso di naturalesa. " Nos mester por keda piska si, pasobra si bo no ta kome piská, bo no ta Boneriano!", anto e ta hari su hari típiko. Rollie tin su opinion tambe tokante kon naturalesa i área di biba di hende mester integrá. E tin un bunita kas, pero el a kumpr'é trahá kaba. Si e lo mester a hasi'é di nobo e lo a tene mas kuenta ku naturalesa. Ku orguyo e ta mostra riba un skina den su kurá kaminda e tin yen di mata i palu krioyo. Asta un par di kadushi e tin. Pero e kas ku e tin ta dushi si. Ta hopi serka di Playa i su trabou. E por hasi tur kos na pia si tin mester. Sin hasi uso di outo ku ta susha medioambiente. Si pa un solo dia e por a implementá un par di lei e lo a kuminsá di hasi obligatorio ku tur hende ta planta un par di mata krioyo den nan kurá. Mata ta perkurá pa oksígeno i esei ta bon pa nos tur. Anto banda di esei e lo a subi e multanan pa tira sushi den mondi barbaramente. *Skirbí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru